

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 17 (1921)

Artikel: Al giubilar Florin Camathias

Autor: Carnot, Maurus

DOI: <https://doi.org/10.5169/seals-881977>

Nutzungsbedingungen

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

Download PDF: 14.03.2025

ETH-Bibliothek Zürich, E-Periodica, <https://www.e-periodica.ch>



Al giubilar Florin Camathias.

Car Sur Florin!

El vitg tiroles, nua che mia cara mumma Paulina spetga sin il grond di dellas posaunas, sesan-fla ina remarcable fenestra sper igl altar grond: leu stat in spiritual en schenuglias, tegn mauns a Diu e ha tonaton buc entuorn tgau quella schinumnda gloriola sco ils sogns han. Da buob miravel jeu savens sin quei remarcabel «sogn», da student hai jeu legiu siu num, da pader hai jeu empriu d' enconuscher el pli datier, era sias scartiras, Igl ei il spiritual Alois Flir, renomau burgheis dil vitg, benefactur della baselgia — e dasperas poet e scri-bent e quei sper igl altar grond!

Capeschas Ti, car amitg, quei maletg? E sia biala significaziun? Ti has celebrau Tiu giubileum sacerdotal d' argien, il pievel grischun ha festivau Tiu giubileum d' aur sco poet romontsch. 50 onns poet romontsch! Igl emprem en bratsch de Tia cara mumma, nua che Ti stendevas Tias manut-tas suenter las neglas sin fenestra e suenter las steilas sin tschiel, lura sco student clustral, nua che Ti empruavas las empremas remas.

Sco preludi per tias atgnas ovras originalas has Ti translatau las pli bialas poesias dils pievels latins naven da Bukarest tochen Barcelona — sur-dau al pievel romontsch ils Retoromans, la flur de Ramuosch e las historias dil munt s. Gieri, Tias

bunamein nundumbreivlas canzuns, Tias cumedias, Tes artechels scientifics e populars, Tiu bi cudisch Sontgas fistas — car Sur Florin, ei par'a Ti, ch' jeu entscheivi sco tier ina confessiun generala, a dumbrar Tes — puccaus, aschi humiliteivels eis Ti staus tochen ussa, has pli bugen ludau auters poets. Ge, senza scuidonza has Ti neu e neu dau laud als auters senza risguard sin Tei. — Co has ti cantau igl onn 16 de tresta memoria!

Dus gronds Grischuns han priu comiau.

O mort, o mort tgei tratgas ti
De far schi vid en la Cadi!
Nos megliers umens van navent,
Giud il cumin, ord il convent:
A Trun has priu il grond mistral
Ed a Mustér il cau claustral —
Las plagas senta cun tristezia
Il pievel en l'entira Rezia.

Quei pievel dell'entira Rezia ha denton giu quitaui, che era *Ti* resties en memoria:

«Ch' el resti verds, Tiu bi tschupi,
Quei ha quitaui l' historia» —

Nies derschader literaric, canoni Caminada, ha numnau Tei nies Uhland romontsch. Cun buna raschun! Il December 1918 hai jeu giu la consolaziun de menzionar Tei e proponer Tei el comite della fundaziun de Schiller per in premi d' honur, il qual ei lura vegnius concludius — Ti sas strusch appreziar, tgei legria triumfala Tiu vegl instructer ha giu lezza sera d' unviern! Ual sin Tei hai jeu adina schi bugen applicau il plaid dil brav Uhland, ch' el sappi buca haver gust per ina poesia, la quala

ruaussi buca sin duas caussas: *la religiun ed il pievel!* Quei ei detg per Tei, cun quei ei detg tut sur da Tei!

Cun omisdus mauns suttascrivel jeu tut quei, ch' il pievel romontsch tras ses qualificai derschaders ha plidau e detg e scret sur dil poet Florin Camathias. Sai jeu pertgei: Tia «Flur de Ramuosch» ei, per miu cor empau romantic ed engiadines, era la pli biala flur de Tiu curtin poetic: quella clara composiziun, quei fin lungatg, quei ferm e grev tratsch grischün sut quella aria celestiala ha incantau mei sco strusch in' autra ovra della literatura dil mund, schi lunsch sco jeu enconuschel ella. In vegl scolast ha buca per moda de flatar. —

Stai bein! Pren per Tei sco poet il plaid dil poet svizzer: «Avunda ei buc avunda» e dai a nus aunc anavos en abuldonza quei che nossa cara pàtria, nossa Rezia catolica e romontscha, ha dau a Ti! *Religiun e pievel* van inaga. — speronza pér en biars onns — suenter Tia bara. Tgei vul Ti dapli sin tiara? Sch' il pievel romontsch fa cun Tei sco il pievel tiroles ha fatg cun siu spiritual e poet Alois Flir e metta Tei sin ina fenestra en in sanctuari, en schenuglias e rugond per nossa patria romontscha — pilver, quei fuss buc ina profanaziun! *Pertgei Tia poesia ei in: Sursum corda!* — Stai pia bein e roga per Tiu pli vegl amitg ed anterius mussader

Mustér, il bi atun 1921.

P. M. C.

